

e scrive il modo fo in quel zorno; et che todeschi erano 4000, venuti per li monti con le grapie ai piedi, et ebene la Piove, e il capitano dil castello poi si rese. Et questa nova à per una lettera di Andrea Constantini, scrive di Cadore a uno suo fradello è in Civald, et lui la mostrò et dete al podestà. Li scrive il successo; e come todeschi fenno alcuni danni a le caxe, butò zoso le porte, messeno a sacho, *tamen* la sua caxa non era stà tochada. *Item*, che il re era a campo a Butistagno; e li havia dà una battaglia, et lui medemo treva le bombarde. *Item*, di quel contestabile Malfato, qual è padoan, et fo mandato li versso Cadore per nostri con 60 fanti, e teniva uno passo di la Chiusa, mia 5 di là di Cadore; qual, vedendossi venir todeschi adosso, *etiam* che i se calavano di monti, dubitando esser messo di mezo, si reculò et vene per tenir uno altro passo di qua di Cadore *etc.* *Item*, avisa esso podestà di Civald, che in quel dì, a dì 24, hore 3 di note, era zonto li il signor Bortolo d'Alviano, vien di Bassan, batando con 5 cavalli, venuto per stafeta, et era partito e andato a la Gardona, ch'è uno passo, e le zente soe veniva drièdo. *Item*, si have, pre' Lucha, orator cesareo, veniva qui, et era zonto in certo locho, al Ponte, sul nostro.

155\* Fo mandato quelli di le raxon vechie zoso, a far preparar a San Zorzi per ditto orator; et si vedrà quello vorà dir.

*Di sier Zorzi Corner, el cavalier, più letere.* Come, inteso la nova di Cadore, veniva batando versso Civald, et scrive di locho in locho, si che subito saria li. Et le zente tutte veniva, havendo lassà forniti i passi di vicentina; et rimarà li il provedador Valier, capitano di Vicenza.

*Di Udene.* Come, inteso di Cadore, domino Hironimo Sovereghan et Francesco Sbrojavacha e altri castelani, con 4000 persone, erano partiti per la volta di la Cargna, per andar versso todeschi et ajutar Butistagno *etc.* *Item*, aricorda che saria bon far uno provedador a Civald di Friul. *Item*, a Goricia si aspectava la persona dil re e zente.

*Di Gusolengo, di li provedadori Emo et Griti, di 25.* Di la conclusion fata de difender Roverè e li passi gajardamente. Noto: intisi nostri li haveano retenuto il passo a tre oratori senesi, andavano al re di romani. *Item*, haveano intercepto lettere di Roma et altri *etc.*

Fu posto, per li savij, elezer *de presenti* uno provedador a Civald di Friul, con ducati 80 al mexe con pena, cavali 5, et si parti il dì sequente. Rimase sier Donado da Leze, fo provedador al sal, *quondam*

sier Priamo, per aversi ben portato provedador al Zante; el qual acetò. *Item*, fo fato 3 sora le stime di le caxe, in locho di sier Tadio Contarini, sier Hironimo Capello, sono intrati savij di terra ferma, et sier Hironimo Querini, à refudà per esser sora le aque; et rimase sier Alvisè Trivixam, fo podestà a Brexa, *quondam* sier Silvestro, sier Marco Zorzi, fo cao dil consejo di X, *quondam* sier Bertuzzi, sier Piero Querini, fo a Treviso, *quondam* sier Antonio.

Fo posto, per li savij, scriver al provedador Corner, dagi dentro e ricuperi Cadore, zoè la Piove. E fo presa di tuto il consejo.

*Di sier Vincenzo Valier.* Voria uno contestabile da meter a la Scala; et fo expedito di qui Antonio da Viterbo, era in Roigo.

Di pre' Lucha si ha, che 'l vien via, et a Treviso lo aspectavano; et si ave dil suo zonzer a Civald *etc.*

#### *Scurtinio dil provedador a Civald de Friul.*

Sier Polo Morexini, *quondam* sier Marco, da Santa Maria Formosa.

Sier Filippo Badoer, fo soracomito, *quondam* sier Zuan Cabriel.

Sier Zuam Moro, fo soracomito, *quondam* sier Damian.

Sier Pexaro da cha' da Pexaro, fo soracomito, *quondam* sier Francesco.

Sier Francesco Duodo, fo provedador a Caxal Mazor, *quondam* sier Lunardo.

Sier Carlo Contarini, el grando, *quondam* sier Giacomo, da Sant' Agustin.

Sier Marco Marzelo, *quondam* sier Giacomo Antonio, el cavalier.

Sier Domenego Dolfim, fo provedador in campo, *quondam* sier Dolfim.

Sier Francesco Zigogna, fo di la zonta, *quondam* sier Marco.

Sier Hironimo Querini, fo di la zonta, *quondam* sier Andrea.

Sier Polo Valaresso, fo retor e provedador a Napoli di Romania, *quondam* sier Cabriel.

Sier Zuan Francesco Venier, fo soracomito, *quondam* sier Moisé.

Sier Pollo Contarini, fo provedador sora i stratioti, *quondam* sier Francesco.

Sier Valerio Marzello, fo di la zonta, *quondam* sier Giacomo Antonio, el cavalier.

† Sier Donado da Leze, fo provedador al sal, *quondam* sier Priamo.